

TE HEHEURAA API

I neia i te piha neneiraa Univereti i Roto Miti i Utah no te Ekalesia a Iesu Mesia i te Feia Mo'a i te Mau Mahana Hopea Nei i Papeete, Tahiti, i te mau fenua Sotaiete, i te mau avae atoa.

Nu. 6

Tiunu, 1918

Mat. 12

Te faaroo nei matou e, no te taraehara a te Mesia ra e ora ai te taata'toa o tei haapao i te mau ture e te mau faauerā o te Evanelia nei.—Hiroa Faaroo Nu. 3.

TE HAAPAO.

I parauhia na e, o te haapao nei o te ture matamua ia i te ao e e riro ia ei parau mau te reira. No ō mai ia Iesu Mesia te ravea faaora i te taeraa mai ia tatou, e nana'toa hoi i faaite mai i te mau ohipa ia ravehia e tia'i ia noaa ia tatou i taua maitai rahi ra, oia hoi ia riro tatou ei melo no te baseleia o te Atua.

O te hoê o te mau ohipa ta'na i faaite mai o te bapetizoraa ia i raro i te pape, ia matara te hara. Te vai ra hoi e tahi mau taata o te ore e faarii i taua oroa ra no te mea aore ratou i haaroaroa maitai i te reira; te na ô mai nei ratou e, e nahea hoi te pape i te horoi ê atu i te hara? E au hoi ia pahonohia taua mau uiraa ra i te na ô raa e; E ere ia i te pape te horoi ê atu i te hara, o te haapao râ i te ture o te bapetizoraa mai tei titauhia e Iesu Mesia te tumu o teie nei ravea faaora, oia hoi te Evanelia. O te haapao nei, eiaha te pape, o te mea ia tei faaore i te hara.

E riro paha ua tai'o ana'e tatou i te parau no Naama-na te raatira rahi no te nuu o te Arii o Suria, e lepera oia. Na te parau a te hoê potii iti Iseraela ei tîtî i roto i te utua-

fare no Naamana ua haere atu Naamana i te fenua no Ise-
raela ma te imiraa i ravea e ora'i oia i to'na ma'i na roto i
te mau raveraveraa o Elisaia te taata no te Atua. Ua parau
maira te Peropheta ra Elisaia ia haere atu Naamana e a
hopu e ia tai hitu noa'tu i roto ia Ioridana e e ho'i faahou
mai to'na huru mau. Aore roa o Naamana i mauruuru i
te parau o te Peropheta no te mea e ohipa iti e te ohie roa
ta te Peropheta i parau mai ia'na. Ua mana'o paha o Na-
amana e faaora ma Elisaia ia'na na roto i te tahi oroa rahi
e te maere. Ua mana'o ihora o Naamana e hau i te maitai
te mau pape i to'na iho fenua e aita oia i ite i te faufaa ia
hopu oia i e hitu taime i roto i te pape Ioridana. E ua fariu
atu ai oia, e a haere ai ma te riri.

Taparu ihora mai to'na mau tavini ia'na e haapao i ta
te peropheta i parau mai ia'na; ua farii ihora o Naamana i
te ao o tona mau tavini e ua haere atura oia e ua hopu atura
i Ioridana e a hitu a'era hopuraa, e ua mâ roa'tura oia. Te
mana'o nei anei tatou ua ora oia ahiri ua hopu oia e pae
noa iho taime e aore râ ua hopu oia i e hitu o te hopuraa i
te tahi atu pape maori râ te pape i parauhia mai e te tavini
o te Atua. Eiaha roa'tu ia. E ere no te mea e maitai ae te
pape Ioridana i ora'i oia, na roto râ i te haapao hua i ta tei
faaue hia mai i ora'i oia i taua ma'i ri'ari'a ra. A rave i
to Bibilia e tai'o ai i te taatoa o teie parau nehehe, e itea-
hia ia te reira parau i roto i te Mau Arii Piti pene pae.

Mai ia Naamana i te tau tahito ê ra e hoê â te huru
o te tahi mau taata i teie nei anatou, aore ratou e mauruuru
i te haapao i ta te Atua i faaue mai e ora'i, ua mana'o ihora
râ ratou e ravea maitai ae ta ratou iho i ite; ia tae râ i te
hopea ra ei reira e ite ai ratou e e mea faufaa ore roa ta
ratou iho mau ravea.

E ferurui rii tatou i te parau no te baptizoraa: Te
faaue nei te Fatu ia baptizohia te taata atoa i raro i te
pape ia matara te hara, e te vai nei hoi te mau parau e
raverahi haapapuraa i te reira vahi. No'atu te reira, te

imi nei te taata ra i te tahi mau ravea êê e matara ai to ratou mau hara. Mai o Naamana i mana'o e e maitai ae te mau pape o to'na iho feuna, i to te pape Ioridana oia'toa te mana'o nei te tahi mau taata, e te parau mai nei hoi ratou, e maitai ae te pipiraa i te utuhiraa. Ua parau atoa mai nei ratou e ere ia te mea maitai ta te Fatu i faaite mai. Tera mai hoi te tahi mau otoheraa no ratou. "E ere te utuhi i te mea nehenehe." e "E mea rave atâ ra." E mea au ore hoi; "E peapea te mana'o;" Aore e anavai to te mau vahi atoa, e i roto i te mau fenua atoa." "Aore i au i te mau fenua toetoe"; "E mea au ore te faahopuraa;" "E ñ te ahu" "Eita e tia ia iriti i te ahu i te vahi taata." No roto mai teie nei mau otoheraa faufaa ore i te hoê vea i neneihia o Lamepa Api te vea no te Porosetani. Aue te haamâ rahi e! ia tuuhia mai te reira mau huru otoheraa ei taafifi i te mana'o o te taata nei. Atira ia i te reira vahi.

E teie nei e feruri faahou tatou i te tahi parau e au maitai e e tano roa i to tatou upoo parau. E feruri tatou i te parau o taua vahini ivi ra o tei roohia i te peapea rahi no te mea aore e moni e haapee i te tarahu o to'na tane pohe ra. Ua fatata te taata titau tarahu i te haere mai e rave atu i ta'na tau tamarii toopiti ei tavini. E peapea rahi to taua vahini ivi ra e ua haere atu oia ia Elisaia peropheta mai te ani atu ia'na e tauturu mai i te imi i te ravea e haapee ai ta'na tarahu.

Ua faite maira te vahini ivi ia Elisaia e maa hinu olive rii ta'na i te fare. Ua parau maira te peropheta; a haere, e tipee haere i to oe mau taata tupu atoa ra, i te mau farii aore e maa to roto, eiaha ia iti. E ia tae mai oe i roto ra, e opani mai i te uputa ia oe e to pue tamarii, a faito ai i roto i taua mau farii ra. Ua haapao maite roa taua vahine ivi ra i ta te peropheta i parau mai ia'na e ua i roa taua mau farii ra ta'na i tipee i te hinu. Ia au i te parau a te peropheta ua hoohia taua hinu olive ra e ua ora te tau

tamarīi no taua vahine ra. A hi'o i te Te Mau Arii II, pene 4.

O te Haapao nei o te tahi tumu ia o te mana mai ia te pure te huru. Ia maere te Ati Iuda i te paari rahi o te Mesia na'na i faite mai ia ratou i te hoê ravea ohie maitai ia ite ai ratou e parau mau anei e aita anei i ta'na mau haapiiraa. ua na ô maira hoi oia: "E ere i ta'u ta'u e haapii nei, na'na râ, na tei tonono mai ia'u nei. O tei hinaaro maite i te haapao i to'na ra hinaaro, e ite ia i ta'u e haapii nei e na te Atua, e na'u iho." Ioane 7: 16, 17.

Te farīi nei tatou ma te feaa ore i ohiparaa o te mau mea maere tatou i ite i te mau mahana atoa ra; oia hoi te ohipa no te mori uira, te ite tatou ia haapao-maite-hia te mau ture o te uira e roaa'i te maramarama i roto i te mori uira; te ite atoa nei tatou ia haapaohia te ture no te mori uira e tere ai te pahi e e horo hoi te pereoo uira e te mau huru matini; ia haapao-ore-hia ra te taata faatere matini i te hoê ture iti e pohe te matini e ua faea te ohipa. Te vai ra te ture no te mau ohipa'toa, e ia haapaohia taua mau ture ra e manuia te ohipa. No reira e ere i te mea maere e ture atoa no te ora e no te mau mea i te pae varua. E ia haapao-maite-hia taua mau ture ra e papu roa ia e roaa te mea i titauhia. Ua parau maira te Mesia na ô maira: "O te faaroo e ua baptizohia, e ora ia No reira ia ore te taata e haapao i te reira ture e ore oia e roaa i taua maitai rahi.

Ua haapii-maitai-hia te parau no te *haapao* no roto ia Iosepha peropheta, tera mai hoi taua parau ra: "Te vai ra te ture tuutuu ore e faauhia i te ra'i hou te tumu o teie nei ao, e te mau mea maitatai atoa e roaa maira ua faaauhia ratou i nia i taua mau ture ra, e te tahi maitai i nia i to'na ture.

E ia roaa ia tatou i te hoê noa'tu maitai no ô mai i te Atua ra, ua roaa ia na roto i te haapao i te ture i faaauhia'i taua maitai ra. Buka Fafau 130: 20, 21.

(E tuatihia i te api 69)

Te Haapaoraa Mau.

Te feia atoa o tei noaa ia ratou te ite i te e'a tia e tae atu ai i te ora muri ore ra, te pee ra anei ratou i taua e'a ra? O te hoê ia uiraa o te fâ mai i te mana'o o tei ohipa i te faatia-raa i te parau mau na te ao atoa nei.

Ia faaroo te hoê taata i te parau o te Evanelia i te a'o-raa-hia, e tupu to'na maere. Aore oia i faaroo i te reira parau i mua'tu. Tatara ihora te hoê taata o tei haapao i te mau parau i haapiihia mai i roto i te Evanelia ra, e ma te tauturuhia hoi e te Varua Maitai ra i te hoê irava parau. Te vai noa ra taua parau ra, e taa noa ia taio. E inaha, te na ô ra oia i te mana'o, o to'u ia ite e o to'u ia faaroo i teie parau, aore â vau i ite i mua ra. No te aha râ? Teie ia, e ore roa to te ao nei e ite i te Atua na roto i to ratou ra paari. Ei te varua ana'e o te Atua e taa ai te mau mea o te Atua. Tei noaa ia'na te Varua o te Atua ra, ua taa ia ia'na te parau mau. Hoi atura oia i te utuafare, ferurei maite ihora i to'na mana'o i te parau ta'na i faaroo ra, e i muri mai, e riro oia i te na ô iho e ua maoro roa oia i te vai-noa-raa ma te ite ore i te haapaoraa "apî"; ei aha ia ia mana'o atu i teie nei? No te ite-raa oia i te maramarama rahi o te mau parau i haapiihia ra, aore te reira i faaitoito ia'na i te imiraa i te ravea e rahi ai te ite, no te mea te taiâ ra oia o te itea noa atu ia'na e aore roa ta'na mau peu i au i tei haapaoraa tia mau. E ore hoi te Varua o te Atua e tupu noa i roto i te aau o te mau taata atoa, e ia mahere ê atu te varua, vai noa ihora oia mai te ite ore i te taatoa o te parau i roto i te Evaneleia, vai noa mai â te papû o to'na ite e o te parau mau ia. Oia mau, e parau-tia roa ta te Aposetolo ra ta Paulo ia Timoteo, "Te hinaaro ratou i te mau mea e navenave ai ra aore hinaaao i te Atua." E i reira, taiva ihora oia i te mau tavini o te Fatu, o te ite

noa iho te hoê o tei au mai ia'na ra e te au atura oia ia ratou, e o te tauaparauphia oia no to'na amui atu i te reira feia; no te mea i teie nei tau, mai tei te tau o to tatou ra Fatu, te faainohia nei tei pee atu Ia'na ra.

Ua parau atu te melahi i te Peropheta ra ia Iosepha Semita e e farerei to'na i'oa i te maitai e te ino i te ao atoa nei. Eaha hoi te tumu e farerei ai i te ino, inaha te haapii ra hoi oia i te mea tia e i te mau haapiiraa e tia i te vairaa? No te mea ia i te feia rave hara ra, oia te mau tiatiavea a te Diabolo ra, e mea hinaaro a'e na ratou ia mou roa te Ekalesia, ia ore ia itehia e to te ao atoa nei e te pee nei ratou i te aratia ateatea e tae atu ai i te pohe.

Mai te tau i fâ mai ai teie nei ohipa rahi o te mau mahana hopea nei, ua huru ê roa e ua huri te mau ture i roto i te mau haapaoraa. Te mau heheuraa a te Fatu i To'na ra mau Peropheta no te tau hopea nei, ua riro ia mai te faahopue ra i roto i te mau haapaoraa atoa i te ao nei. Ua parau te hoê taata paari no teie anotau i te hoê parau hohonu i te na ô raa e, "Te Haapaoraa Moromona," o te faaroo ia e tupu i te ao nei.

O Paulo, te aposetolo o te Edene, i te pari-raa-hia oia i mua i te aro o te Arii ra o Ageripa i te hairesi, ia hope ia'na te parau no te riroraa oia ei taata faaroo e no te huru o ta'na ra haapaoraa, parau atura oia, "E te arii, e Ageripa, ua faaroo oe i te mau peropheta? Ua faaroo oe, ua ite au." Ua parau maira Ageripa ia Paulo, "Ua faatata vau i te riro ei Cherisetiano ia oe." (Ohipa 26: 27-28). Te i'oa Cherisetiano i topahia i te feia i pee atu i te Mesia ra, e parau faaino ia i te reira tau mai te "Moromona" i to tatou nei anotau. O te au-
raa ia o teie nei parau e "Moromona" i te feia neneva o te faaoti oioi noa i te parau ma te faaroo ore na mua, ma te haamana'o ore ratou i te parau a te Fatu i papaihia i roto i te Evanelia a Mareko ra 10: 29-30, "Ua parau atura Iesu, na ô atura, Oia mau ta'u e parau atu ia outou nei, Aore roa e

taata i faarue i to'na fare, e te mau taeae, e te mau tuahine, e te metua tane, e te metua vahine, e te vahine iho, e te mau tamarii, e te fenua, no'u e no te evanelia nei, e ore ai i te noaa ta'na e hanere atu i teie nei ao, i te fare, i te taeae, i te tuahine, i te metua vahine, i te tamarii, i te fenua, e te hamani ino; e i te ao to muri ra, o te ora mure ore ia."

Te Parau Niuniu.

Te faaite haapapuhia maira e ua maru mai o Bulutaria i te Hau Amui e ua faaea roa i te aroraa i o ratou, ua horoa mai te Bulutaria i to ratou mau e'a hororaa pereoo auahi no te Hau Amui.

Te hamani ino ra te Purutia e te huiraatira i te mau oire haru ore i Beletita. E noa'tu te parau patoi a te taiete reva satauro uteute tauturu taata, eita te Purutia e faaroo e atira te hamani ino i to Amarika mauauri.

Ua tupu te taparahi-raa taata i rotopu i to Purutia iho i Kiel te vahi tapuniraa manuâ Purutia.

Ua tonu te Purutia i Farani e farerei ia Foch no te faahauraa i te tama'i i na Purutia tiaraa teitei ra o Von Greenell Tenerara e o Von Winterfeld Tenerara e o Meuras Atimarara e o Von Hintze Atimarara.

E nehenehe ia tatou ia oaoa, ua upootia te Hau Amui.

Ua topa rii mai e ua maru roa mai, e ua vî roa o Purutia e i tuu ai te mau auaha o Purutia i ta ratou mau i'oa i raro a'e i te parau faahau.

E faahoi mai o Purutia ia Elsass Lorraine.

E hoo o Purutia i te mau ino atoa.

E tiamâ roa te mau Hau rii nainai.

E mou roa te mana Emepera Purutia.

E ore roa te puai o te faehau Purutia.

Ua horo te Kaiser e te tamaiti (Krompriz) i Holane i te poipoi Sabati, e to'na mau êê e te mau feia tora no raro a'e ia'na, e 10 pereoo uira i te faahororaa ia ratou. E avava to te vaha o te Kaiser i te haereraa i Holane.

Ua mau te mau e'a pereoo anahi i Purutia i te feia orure. E ati ri'ari'a to roto i Purutia na roto i te taata e pohe noa ra e e eita e ore te ati poia. Ua piri te ooa Kiel vairaa manuâ i te feia orure. Ua haru hoi ratou i te oire mau, tei reira te hamani-raa ohipa tama'i, oia, o Essen.

Tei te reo o te Kaiser a tuu ai oia i to'na i'oa iraro e te parau no te vaiihoraa i te toroa: E mea tia mau paha ia'u ia vaiiho i to'u toroa ei maitai no te hau Purutia

Te haaviti noa ra te mau faatere apî i te imi i te ravea e hau ai te orurehau a te huiiraatira o Frederick Ebert tei maiti hia ei faatere hau no Purutia. Na te huiiraatira iho ra te parau rahi i Purutia i teie nei, e te titau puai ra te huiiraatira ia hau oioi te tama'i.

Ua faaite te apoora atimarara Amarika i te mau tutauraa manuâ Amarika e ua hau te tama'i i te poipoi Monire i te hora 5 i te mahana 11 no Novema i te Matahiti 1918.

Eiaha te hau Holane e hinnaro ia faaea te Kaiser i reira. E mea tapuni noa te Kaiser i te hororaa i Holane.

Te faaite maira to Holane e te opua faahou ra te Kaiser e hoi i Purutia no te rahi o te peapea i roto i Holane.

Ua tauatani e ua tauatani to tatou mau faehau tîti i o Purutia, mai ia Farani, Paratane, e Beletita, tei faahoi noa mai nei i Farani.

E 18,000 to te Amarika mauauri i teie nei i faahoi hia mai no Purutia.


E mauhaa tama'i rahi roa tei riro i te Amarika te pupuhi fenna, te pupuhi taviri, te ofai pupuhi e te hoê fare rahi vairaa pahi maue.

(Tuatiraa)

Tera'toa te tahi irava tano maitai i nia ta tatou e parau nei: "Ua tapeahia vau o te Fatu ia haapaohia e outou ta'u ra mau parau, ia ore râ outou ia haapao i ta'u ra parau, aore ia ta outou e parauraa mai i reira."

Buka Fafu 82: 10.

E ere hoi te ravea faaora oia hoi te Evanelia e mea papu ore e te tapitapi; e ravea papu râ e te ohie maitai. Ua ite tatou ua hi'a te taata e ua roohia oia i te paruparu e te hara; na roto râ i te Evanelia ua tuuhia mai te ravea e ora faahou mai ai oia. No te taraehara hoi a te Mesia ra e ora'i te taata'toa o tei haapao i te mau ture e te faaueraa o te Evanelia nei.



E hoho'a api teie no te Peresideneraa te Ekalesia e te tino ahuru e ma piti aposetolo.
Ua nenehia teie hoho'a i te 6 no Epelera 1918.

O VAI TE PATOI?

Te hinaaro nei te Atua ia ora te taata. Eaha te mea te patoi nei te taata ia ore ia faaorahia? E mea maere ia, o vai te taata e patoi i te Atua?

Te patoi nei te taata haavare i te Atua, o oia i faaino i ta te Atua e hinaaro i te haamaitai.

Te patoi nei te taata eiâ i te Atua, o oia i eiâ i ta te Atua i horoa mai i ta'na taeae, e riro ai te haamaitairaa o te Atua ei mea ore.

Te patoi nei te taata faataero ava i te Atua, o oia i faamaamaa ia'na iho ta te Atua i hinaaro ia riro ei taata paari.

Te taata e rave huna i te hara, te patoi atoa nei oia i te Atua, no te mea te haamaoro nei oia i ta te Atua ohiparaa nei oia i ta te Atua ohiparaa ia'na ra.


Te patoi nei te taata faatau i te Atua. Mai te mania i tua oia, aita i tia i te boti ia tere. Te haamaûa nei oia i te taime a te Atua.

Te patoi ite hua nei e tahi pae, aita rea râ ratou. No te ite ore te patoi nei e tahi pae, aita rea hoi ratou. No te aau paruparu te patoi nei e tahi pae, e tiaa iti rahi ratou. Mat. 26:41. E mea paruparu mau ia te taata. Te opua nei oia e rave i te maitai, e arau iti a'e te rave nei oia i te ino. Te vai nei râ te ravea e noaa'i te puai e ore ai te ino e mana'i i nia ia'na. O te imi i te parau mau e haapao maite i te reira e noaa ia te mana i nia i te mau iino atoa. E vi te ino ia'na e e riro to'na ra paruparu ei puai etaeta. Ioa. 8:31, 32. Maseli 24:5.

O te imi, e itea ia. O te ore e imi, e pohe ia i te pohe-raa no te maua. A tia i nia, a imi. E ia itea, a haapao ma te tuutuu ore. Atira'tu ai te parau.

Farani Tuterera.

po
E
fei



E hoho'a teie no te Epitetopo ra o Orrin P. Mila o te pohe. Te tauturu piti oia i te Epitetopo rahi no te Ekalesia. E taata hau i te maitai e te maru roa; e hoa mau oia no te feia veve.

TE MATA PITI.

“E ore te feia e parau mai ia’na ra e, E te Fatu, e te Fatu, e hope paatoa i te tae i te basileia ra o te ao, o te taata râ i haapao i te hinaaro o tau Metua i te ao ra.” Mat. 7:21.

Eaha te auraa no teie nei parau? Tera ia; E rave rahi te feia Ekalesia e ore e tae i roto i te basileia ra. Eaha te mea e ore ai e tae ai? Tera’toa ia; no te mea te pinepine ra ratou i te pure, e te himene, e te a’o i te parau i mua i te aro o te tino no te Ekalesia, e ia hope te pureraa ua ho’i i te utuafare e ua haavare i te taata tupu, e aore râ ua êia i ta vetahi ê ra ta’oa, e aore râ ua opere i te parau vavi, ua faaturi, ua faataero ava, ua hoo haavare i te ta’oa, ua faai-no ia vetahi ê, ua faatau ua parahi noa, e aore râ ua rave i te mau huru ohipa e au ore i te parau a te Atua; oia hoi ua mata piti ratou ra, e haapaoraa ê to ratou i roto i te fare pureraa i te Sabati e i rapae au ra i na mahana e ono no te hepedoma nei.

Ei mata hoê tatou e tia’i, oia hoi ia i to tatou aau i te pure, e te himene, e te parau e au ia a’o, e ia itoitoe hoi to tatou na rima i te raveraa i te mau huru ohipa e maitai ai tatou iho e vetahi ê atoa ra i te mau mahana’toa no te hepedoma, Ei reira to tatou maramarama e anaana mai ai mai te mori i tutuihia i nia i te vairaa e maramarama’i te feia’toa e hi’o ra, e faaturahia tatou e te feia parau-tia, e e hi’o mauruuru mai ai te Atua ia tatou nei.

A tahoê i to tatou hiroa aau.

—*Farani Tuterera.*

TOAE A MAERE, Faaau Parau, Rue Dumont d’Urville, Orovini, Papeete, Tahiti.
ERNEST C. ROSSITER, Imprimeur, Rue Brea et de la rue Damont d’Urville, Papeete, Tahiti.